

53 en outre ie suis pauvre & hors de la puissance de te ||
pouuoir faire du bien comme peut monsieur du Pont,
aduise donc bien à ce que tu dois faire, afin que tu ne
t'en repente *point par après : car ie te dis de rechef que
ie t'ayme & ne te peux faire riche. Il n'importe, res-
pondit Choumin, j'ayme bien monsieur du Pont &
tous les François, mais ie t'ayme encore plus qu'eux
tous. C'est pourquoy ie veux qu'il se nomme Pere Io-
seph, & quand il sera grand ie te le donneray pour l'inf-
truire & demeurer avec toy, car ie ne veux point qu'il
soit marié, ains qu'il soit habillé & viue comme toy.

Et puis luy monstrant son autre fils qui estoit celuy
qui a esté depuis baptisé à nostre Conuent de Kebec, &
trauailé par le demon, luy dit : en voicy encore un
autre que ie te donneray quand il sera un peu plus
grand pour enuoyer en France, & veux qu'il soit bap-
tisé & viue encore comme toy, sans femme & en mesme
habit. Ils eurent plusieurs autres entretiens sur ce su-
jet, dans lesquels le P. Ioseph prenoit occasion de luy
parler de Dieu & de nostre croyance, & le Sauvage de
l'entretenir de leurs refueries & superstitions auxquelles
il recognoissoit luy mesme par les raisons du Pere, un
grand aueuglement. Puis fut conclud que le nouveau
né se nommeroit Pere Ioseph, & y est encore appelé
par les François & par tous ceux de sa nation.

Le 30 de Novembre parut sur leur orizon la mesme
comette qui paroissoit en France iusqu'au 22 de De-
cembre, qu'elle ne se vit plus, tellement qu'on pouuoit
54 donner là la || mesme interpretation qu'on en donnoit
icy. Plusieurs escriuains ont employez leur plume &
leur temps pour descrire des effects des comettes, &